

Date – 16/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoman Mizoram Universal Healthcare Scheme (MUHCS) 2 point 0 a tlangzarh.
2. Health Minister Pi Lalrinpuiin kar kalta Inrinnia a bial Lunglei East chhunga nau chung a nu thihna a thleng chu chhui mek a ni a ti.
3. Election Commission chuan vawiin khan Assam, Keralam leh Puducherry Assembly inthlan chungchanga hraitirna a tichhuak.
4. Sawrkar laipui chuan Stand-up India scheme zawhfel tawh chu tuaithar lehin SC,ST leh Hmeichhia mahnia sumdawna kalpuite tan hamthatna a pe leh dawn.



CM

Chief Minister Pu Lalduhoman Mizoram Universal Healthcare Scheme (MUHCS) 2 point 0 a tlangzarh a, MUHCS 2.0 ah hian empanelled hospital ni loa in-refer dan chu khauh zawka kalpui a ni tawh ang a ti.

Vawiin khan Assembly Annexe Conference Hall-ah MUHCS 2.0 hi Chief Minister hian a tlangzarh a, hemi rual hian MUHCS 2.0 leh MUHCS chungchanga hriatchian duh neite leh harsatna thlenna tur dedicated call centre 'MUHCS Chhawntu' a tlangzarh nghal a ni.

Chief minister Pu Lalduhoma chuan sorkar kumthar lo awm turah MUHCS 2.0 atan hian cheng vbc 130 dah a nih thu a sawi a; MUHCS 2.0 ah hian empanelled hospital ni loa in-refer dan chu khauh zawka kalpui a nih tawh dawn thu sawiin, in refer hi MUSHC 1.0-ah hman sual a nih nasat avangin MUHCS 2.0-ah chuan ICU-a admit nghal ngai damlote, nunna chhan nana zai nghal ngai leh accident avanga zai nghal ngaite chauh refer theih an nih tawh dawn a ti.

Mizoram chhunga private damdawi-in zinga tun dinhmuna MUHCS la zawm ve lote pawhin MUHCS an zawm ve ngei theih nan sorkar chuan indawrna a la kalpui chhonzawm zel tih sawiin Chief Minister chuan, rate thu-hlaah inremna a awm theih nan heng private damdawi-inte hi propose package rate siam tura tih a nih thu a sawi a; private damdawi-inte chu MUHCS 2.0-ah hian mipui tan ti a sorkar thawhpui theuh turin a sawm nghal bawk.

Mizoram State Healthcare Society-in an tarlan danin, MUHCS hnuaiiah hian wawiin thlengin bill atan cheng vbc 157 point 61 a pechhuak tawh a, AB PM-JAY golden card hmangtute tan cheng vbc 56 point 82 pek a ni tawh a ni.

<><><>

HEALTH MINISTER

Health & Family Welfare minister Pi Lalrinpuii chuan kar kalta Inrinnia a bial Lunglei East chhunga nau chunga nu thihna a thleng chu pawia tih thu a sawi a; thil thlen dan chhui chiang turin preliminary investigation an zawh tawh thu leh magisterial inquiry ti turin an buaipui mek a ti.

Pi Lalrinpuii hian wawiina Mizoram Universal Healthcare Scheme 2.0 tlangzarhna inkhawma thu a sawinaah sorkar damdawiinte tichanglung tur leh thawktute indaihlohnate tiziaawm tura theihtawp an chhuah mek laiin a bial chhungah damdawi inenkawlina hmuh mai loh avang leh chhan dang dang avanga nau chunga thihna a thleng chu pawia tih thu leh a rilru a nat thu a sawi a ni.

Indian Constitution Article 21-ah chuan mimal nunna humhalha vawnhim hna hi sorkar kutah a awm a, chumi thawktu sorkar hnathawk - Civil Hospital Lungleia thawktuten khum a awm lo tia mi chanhai tak an lo hnar mai chuan a rilru a ti hle tih sawiin Health Minister chuan, tanpui ngai tanpui thei loa a department-te an awm chu lungchhiat thlak a tih thu a sawi bawk.

He thil thleng hi Medical Council of India-in Code of Medical Ethics a tihchhuah item 13-na pawh a kalh tlat tih sawiin Health Minister chuan, he thil thleng hi dan anga chhui a ni a, preliminary investigation a zo tawh a, tunah hian magisterial inquiry lak a nih leh dan tur buaipui mek a ni, a ti.

MHIP Sub.Hqtrs.Lunglei chuan kar kalta March ni 12-a Pi F. Lallawmkimi thih dan chu vanduaithlak an tih thu leh an chhungte an tuarpui takzet tih an sawi. Sorkar damdawiin berin hetiang buaipui thei lova, Private Hospital lam a an lo tir khawtlai chu mak an tih thu sawiin thawktute inenfiah a ngai hle an ti a. Miin khawlaia Nau a cheh tawh anih chuan khum ruak awm leh awm lovah buai lova, naute leh a nu nunna chhan ngei tur a theihtawp chhuah chu an tihmakmawhah an ngai a, an duty an ngaihthah chu Pi F. Lallawmkimi boral chhan ni ngeiah an ngai an ti.

Lunglei Dist Congress Comtt(LDCC) pawhin he thihna hi pawia an tiin mawhphutu te an dem takzet tih an tarlang a, hetihruah hian he thihna hian thil tha zawk thlen sela, Sorkar damdawiin leh Sorkar pisa dangah hnatahwktu te tan hmanraw tha pek a tulzia a ti lang a, tumahin tawrh belh zui lovin health Minister Pi Lalrinpuii hian a bial chhung a thil thleng anih angin mawhah la ngam sela, zangnadawmna an hmuh theih nan hmalak sak se an ti a ni. Congress sorkar laia Zobawk-a PHC leh Medical Quarter an sak zawh vek tawh te chu tuaihnumin nauneihna tlakah ZPM sorkar chuan siam se an tih thu an sawi.

<><><>

SESSION-AR

Chief Minister Pu Lalduhoman Assam Rifles-in Zokhawsanga an ram luah chu kum 99 chhung atan land lease pek a nih thu a sawi a; land lease chu pek an nih anga hman anih loh chuan sorkarin a laklet theih thu a sawi.

Vawiina Assembly session-ah zawhna chhangin Chief Minister chuan, Assam Rifles-in Zokhawsanga an ram luah chu land lease-ah kum 99 atan pek a ni a, a hma pawh khan chutianga kal chu a nih thu sawiin, land lease reng reng chu a hmanna tur atana hman chhung atana pek an ni a, thil dangah an hmang thiang lo a, an hralh thiang lo a, pek chhan ang khan an hman loh chuan sorkar khan a nei let leh thei, a ti.

Assam Rifles-te hi chhiah àwl an nih thu sawiin Chief Minister chuan, Zokhawsanga AR te leh an awmna bula ram neitute inkara harsatna awm thin chungchangah inbiakremna a awm tawh a ti bawk a; Assam Rifles te leh Mizoram sorkar inremna chu record an dah lem lo tih a sawi.

<><><>

FILM FESTIVAL

Ni thum awh tur ‘Lemchan – Mizoram Film Festival 2026’ chu I&PR Office Aizawl-ah tan a ni.

Ministry of Information & Broadcasting, National Film Development Corporation leh state sorkar Directorate of Information & Public Relations tangkawp ten Mizorama a vawikhatna atan Mizoram Film Festival hi an buatsaih a, I & PR Minister Pu B. Lalchhanzovan a hawng a ni.

Lemchan – Mizoram Film Festival hi I&PR office, Treasury Square-ah ni 18 thleng khian neih tur a ni a. Ni thum chhung hian film lama mithiamte hnen atangin zirtirna hrang hrang neih a ni dawn a, state hrang hrang film thlan bikte leh Mizo film-te chhuah a ni dawn bawk. He festival-ah hian India state hrang hrang atangin film siam lama mithiam engemawzat sawm an ni.

Festival chhim tura sawm, Bollywood filmstar Pi Lilette Dubey chuan festival hawanna inkhawmah hian thusawiin, emchan leh rimawi hi kum tam tak ral hnu pawha an hlutna hloh lo an nih thu leh hnam hrang hrang leh tawng hrang hrang hmangtute thlunzawmtu pawimawh tak a nih thu a sawi.

NFDC Domestic Film Festival Head Pi Gouri Nair pawhin thusawiin, he festival hi Mizoram leh North-east region-a film lama hmasawna thlentu pawimawh tak ni se a ti a ni.

<><><>

SESSION-DEMAND

Vawiin Assembly Budget session ni hnukung berah Chief Minister Pu Lalduhoma leh minister of state Pu F. Rodinglana te department enkawl sum hmanna tur ruahmanna sawiho a ni.

Chief Minister Pu Lalduhoma enkawl department-te demand hi a vaiin cheng vbc 5,512 point 79 a ni a; chu'ngte chu - Legislative Assembly tan cheng vbc 37 point 66, Governor tan cheng nuai 30 point 8, Council of Ministers tan cheng vbc 9 point 03, Law & Judicial department tan cheng vbc 81 point 67, Vigilance department tan cheng vbc 8 point 06, Finance department tan cheng vbc 4,777 point 83, Secretariat Administration department tana cheng vbc 131 point 21, Planning & Programme Implementation department tan cheng vbc 360 point 78 leh General Administration department tan cheng vbc 106 point 23 a ni.

Minister of state Pu F. Rodinglana department enkawl pahnih - Power & Electricity department demand cheng vbc 1,002 point 68 leh Commerce, Industries, Geology & Mining department demand cheng vbc 63 point 58-te hi a vaiin cheng vbc 1,066 point 26 a ni.

<><><>

MNF

MNF party chuan Chief Minister Pu Lalduhoma chu thudiklo sawi thinah puhin, thudik chauh sawi tawh thin tura phutna punkhawm vawiin khan Aizawl Vanapa Hall tualah an huaihawt.

He hunah hian MNF Party Treasurer Pu Lalruatkima chuan thusawiin Mizoramah sum lengvak a tlem a, thudiklo erawh a leng nasa hle a. UNNATI chungchangah hian Chief Minister chu thudiklo sawiah a puh loh theihloh a, UNNATI leh SBI a hriatpawlh tlat chu a mak a. Lengpui ram hralh sum kawngbo nen a hriatpawlh em ni tih chu an zawhna a ni a ti a. AMC election chungchangah a chhan sawi tur awm si lovin inthlan an puang theilova, an candidate tur pawh an la puang theilo a ti a, MNF hmalakna- ZPM sorkarah a hlawhtlinna tak lolang ta Assam Rifles chhuahsan ram cheibawl tur chu lawmawm an ti a, amaherawhchu Aizawl mipuite chanai AR-te duhsak taka tui supply tute leh AR ten lei man zawng zawng an awl bikna tura inremna siampuitu sorkar an awm chu a pawl takzet a ni a ti.

MNYF HQRS Vice President Pu Lalnunmawia Pautu chuan thudik nge thudiklo a ni tih hriat loh, mi dangte diriam thin, Assembly House chhung leh pawnah thudiklo tam tak sawi thin Chief Minister neih a ni chu a pawl a ni a ti a, Kum 2024 July thla khan Chief Minister leh a thawhpuite thudiklo sawi 100 an lo hal tawh thu leh Chief Minister thudiklo sawi thar lam tam tak an hal leh dawn a ti a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ELECTION

Election Commission chuan vawiin khan Assam, Keralam leh Puducherry Assembly inthlan chungchanga hraitirna a tichhuak. Nimin khan Election Commission chuan Assam, Keralam, Puducherry leh Tamil Nadu te hi thawhkhata inthlan anih tur thu a puang a. Hetilai hian West Bengal erawh inthlan hi thawh hnihah neih a ni thung ang.

Member 126 awmna, Assam, Seat 140 awmna Kerala leh seat 30 awmna Puducherry-ah April ni 9 ah vote thlak a ni ang a, Seat 234 awmna, Tamil Nadu-ah

April ni 23-ah vote thlak a ni ang a, West Bengal ah hian April ni 23 leh ni 29 ah vote thlak a ni ang a. Vote hi a rualin May ni 4-ah chhiar a ni ang



WESY ASIA

West Asia-a indona chuan ni 16 na thleng tawhin inkahna a nasa zual sauh a. Tukin khan Dubai International Airport kah a ni a. hemi hnu hian nasa takin kangmei a chhuak nghal a. Thuneituten kangmei hi rang takin an thelh nghal a. Thlawhna thlawk chhuak tur thenkhat chu thulh a ni a. Thlawhna thlawh chhuah hun pawhsei te pawh an awm a ni. Air India leh Air India Express chuan Dubai thlawk tur zawng zawng a thulh a ni.

Puan tawh anign US leh Israel te chuan ahma aia na zawkin Iran an kap leh a. Iran-a Industry tamna khapwui Isfahan chu vawi tam tak kah a ni a, missile 15 chuang kah niin heng zinga pakhat hian factory a fuh a.He factory a thawk mi 15 an thi nia thudawn a ni. Islamic Revolutionary Gaurd Corps te chuan chhangletin Israel hmun engemawzat an kap a ni.

US President Donald Trump-a chuan Tehran nena inremna siam thei dinhmunah an ding lo tih a sawi a. President Trumpa chuan Iran in tuialhthei a thawnchhuahna pui ber Kharg Island chu kahah a vau zui nghal a ni.



STAND UP INDIA

Sawrkar laipui chuan Stand-up India scheme zawhfel tawh chu tuaithar lehin SC,ST leh Hmeichhia mahnia sumdawnna kalpuite tan hamthatna a pe leh dawn. Vawiina Lok Sabha-a zawhbelhna chhangin Union Finance Minister Nirmala Sitharaman-i chuan Stand-up India Scheme hi Aprtil 2016 khan bul tan anih thu sawiin nikum March thla khan a tawp a. NITI Ayog leh department lam mithiamten an zirchian hnuah a hamthatna dawngtuten ahma aia tha an dawn theih nan tuaithar leh a ni a ti.

